

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆԻ  
ԱՇԽԱՏԱԿԱՐԳԱՅԻՆ ՈՐՈՇՈՒՄԸ**

**«ԱՐԻՆԵ ՔԱՐ ՈՒՈՇ» ՍՊԸ-Ի ԴԻՄՈՒՄԻ ՀԻՄԱՆ ՎՐԱ՝ «ԷԼԵԿՏՐՈՆԱՅԻՆ ՀԱՂՈՐԴԱԿՑՈՒԹՅԱՆ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԻ 49-ՐԴ ՀՈՐՎԱԾԻ 2-ՐԴ ՄԱՍԻ 3-ՐԴ ԿԵՏԻ՝ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐՈՒԹՅԱՆԸ ՀԱՄԱՊԱՏԱՍԽԱՆՈՒԹՅԱՆ ՀԱՐՑԸ ՈՐՈՇԵԼՈՒ ՎԵՐԱԲԵՐՑԱԼ ԳՈՐԾԻ ՎԱՐՈՒՅԹԸ ԿԱՐՃԵԼՈՒ ՄԱՍԻՆ**

Հայաստանի Հանրապետության սահմանադրական դատարանը **ՈՐՈՇԵՑ**.

1. Հաշվի առնելով, որ դիմողի գործի առնչությամբ 08.04.2011թ. կայացված որոշմամբ ՀՀ վերաքննիչ քաղաքացիական դատարանը բավարարել է վերաքննիչ բողոքը, բեկանել ՀՀ Սյունիքի մարզի ընդհանուր իրավասության դատարանի 04.02.2011թ. թիվ ՍԴ/0961/02/10 վճիռը և գործն ուղարկել նույն դատարան՝ նոր քննության, և, ըստ այդմ, ընդհանուր իրավասության դատարանի կողմից գործով ըստ էության նոր վճիռ կայացնելուց հետո դեռևս պահպանվում է վերաքննության և վճռաբեկության կարգով բողոքարկման ձևով դատական պաշտպանության միջոցներից օգտվելու հնարավորությունը, դիմողը ՀՀ Սահմանադրության 101-րդ հոդվածի 1-ին մասի 6-րդ կետի և «Սահմանադրական դատարանի մասին» ՀՀ օրենքի 69-րդ հոդվածի 1-ին և 7-րդ մասերի պահանջներին համապատասխան չի սպառել դատական պաշտպանության բոլոր միջոցները և, հետևաբար, **իրավասու չէ դիմել սահմանադրական դատարան:**

2. Ինչպես հեռախոսային խոսակցությունների և այլ հաղորդակցության գաղտնիության պաշտպանության օրենսդրական երաշխիքների, այնպես էլ համապատասխան միջազգային փորձի ուսումնասիրությունը վկայում է, որ հեռախոսային խոսակցությունների գաղտնիության իրավունքն իր էությամբ վերաբերում է ֆիզիկական անձանց և կազմում է ֆիզիկական անձանց կյանքի անձեռնմխելիության իրավունքի բաղկացուցիչ մասը, մեկնաբանվում է որպես անձի անձնական կյանքի, ընտանեկան կյանքի գաղտնիության իրավունքի տարր, ինչպես նաև անձի իրավական կարգավիճակի բաղկացուցիչ: Հեռախոսային խոսակցությունների գաղտնիության իրավունքը կրող սուբյեկտը ֆիզիկական անձն է, և,

ըստ այդմ, այդ իրավունքի խախտման դեմ պաշտպանություն կարող է հայցել այն ֆիզիկական անձը, ում հեռախոսային խոսակցության իրավունքն անմիջականորեն խախտվել է:

Դիմողն ունենալով իրավաբանական անձի կարգավիճակ՝ չի հանդիսանում Սահմանադրության 23-րդ հոդվածով երաշխավորված՝ հեռախոսային խոսակցությունների գաղտնիության իրավունքը կրող սուբյեկտ: Իրավաբանական անձը՝ պայմանավորված իր և իր գործունեության բնույթով, կարող է հանդես գալ կորպորատիվ կամ/և ծառայողական գաղտնիքի պաշտպանությամբ, ինչը, սակայն, չի հանդիսացել դատարաններում քննված գործի առարկա: Հետևաբար, դիմողը, չլինելով հեռախոսային խոսակցությունների գաղտնիության իրավունքը կրող սուբյեկտ, իրավասու չէ դիմել սահմանադրական դատարան՝ հեռախոսային խոսակցությունների գաղտնիության իրավունքի խախտման առնչությամբ:

3. Ղեկավարվելով Հայաստանի Հանրապետության Սահմանադրության 101-րդ հոդվածի 1-ին մասի 6-րդ կետի, «Սահմանադրական դատարանի մասին» ՀՀ օրենքի 32-րդ հոդվածի 2-րդ կետի, 60-րդ հոդվածի 1-ին կետի, 69-րդ հոդվածի 1-ին և 7-րդ մասերի պահանջներով՝ «Արինե Քար Ուոշ» ՍՊԸ-ի դիմումի հիման վրա՝ «Էլեկտրոնային հաղորդակցության մասին» ՀՀ օրենքի 49-րդ հոդվածի 2-րդ մասի 3-րդ կետի՝ Հայաստանի Հանրապետության Սահմանադրությանը համապատասխանության հարցը որոշելու վերաբերյալ» գործի վարույթը կարճել:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՍԱՀՄԱՆԱԴՐԱԿԱՆ ԴԱՏԱՐԱՆԻ  
ՆԱԽԱԳԱՀ**

**Գ. ՀԱՐՈՒԹՅՈՒՆՅԱՆ**

13 մարտի 2012 թվականի  
ՍԴԱՈ-16